





















12

HUMBLE
REMONSTRANCE
AU ROY,

SVR LES MOUVEMENTS
de la Rebellion.

A PARIS,

M. D. C. X X V.

Legi. N.

Case

F

39

320

1625 hu

THE NEWBERRY
LIBRARY

H V M B L E
R E M O N S T R A N C E
A V R O Y,

Sur les mouuements de la Rebellion.

O V courez-vous malheureux, où courez-vous ainsi de furie ? disoit le Poëte Horace aux rebelles de son temps : Le sang des Latins ne vous paroist-il auoir assez rougi les campagnes & les mers ? encore si vous armiez pour reduire en cendre les fieres tours de Penueuse Carthage en faueur de Rome, ou pour triompher des Insulaires non vaincus de la Bretagne, ferrez de chaines par le milieu des grandes ruës ? mais c'est (en fauorissant le dessein des Parthes) à fin que la ville perisse d'elle mesme, & par les siens : effect, que ny loups rauissans, ny lyons cruels n'ont exercé iamais enuers leurs pareils. Est-ce vn auoulement de forcenerie. ou quelque

4

nécessité violente, ou bien vos transgressions qui vous font aller ce train? parlez? respondiez? Ils ne disent mot, le visage leur blefmit, & le cœur leur bat d'estonnement, il est ainsi.

Nous pouuons faire aujourd'huy le mesme discours enuers les mutins, à qui V. M. SIRE, a donné plus d'une fois la vie: nous le pouuons, en leur disant: Armez vous de rechef malheureux traistres? les plaines de Xainctonge & de Guyenne ont-elles pas assez rougy du sang valeureux & braue des meilleurs François? Encore si vous alliez à la guerre dans les campagnes des estrangers, pour l'accroissement des Fleurs de Lys, & pour vous efforcer à les vouloir rendre maistresses de l'Vniuers? mais c'est à fin, rebelles miserables, qu'à l'auantage des ennemis de France elles tombent en ruine par les mains de ses enfans. Ainsi leur conuient-il parler,

encore est ce trop peu, veu leurs infidelitez, SIRE, & leurs mauuais desseins contre l'honneur & l'hommage tres-humble qu'ils doiuent rendre à V. M.

Si ie parle ainsi d'eux, ay je pas raison? quelles paroles suffiroient à leur grauer la honte sur le front? quel blâme seroit capable de leur infamie, ayant tourné visage ingratement à leur deuoir? continuant & renoüant leurs desloyautez, quand ils en deuroient faire perdre la memoire en leur regret avec des meilleures actions? mais que les bonnes actions & les œuvres de merite peussent naistre en des ames sans foy, des ames, qui par vne maxime autant chere à leur pensée, qu'elle est odieuse en apparence à leur bouche, ne veulent non plus ny de Roy, ny de Loy, pour rendre tout égal.

Quelques fois le trop d'indulgence & de bonté, SIRE, nuit aux Grands,

pource qu'il est besoin de trencher les
membres pourris & gastez, ou le corps
seroit en danger. L'Histoire est vn mi-
roir, qui doit par exemple faire donner
à la iuste colere au besoin, ce que l'on
refuseroit à la douceur. Hercule est-il
pas loüé d'auoir reduit à neant les testes
de l'Hydre qui renaissoient? Les Che-
nilles des arbres que l'Hyuer on pensoit
amorties, se réueillēt dans le Printemps,
& menant la guerre aux fruiçts elles
perdent tout: en fin l'Occasion doit e-
stre happée aux cheueux, si l'on veut
que tout aille bien.

Ces rebelles, qui ne degenerants
point de leur constellation desloyale,
font le mal contre le bien: ces mutins
qui n'aduouëront point iamais auoir e-
sté de meilleurs François qu'eux, tes-
moignent bien à ceste heure qu'ils par-
lent de la bouche seulement, comme ils
ont tousiours fait, de penser distraire

V. M. SIRE, des bons & legitimes desirs qu'elle a de remettre la France où premierement elle estoit : Ces broüillons monstrent leur derniere vigueur pour y faire teste (mais en vain) n'ayāt soucy qui les maistrise, Arabe, ou Turc, pourueu que leurs desirs soient en valeur, & que leurs Monstres durent: mais il est vn DIEU là haut & partout, qui void toutes choses de ses yeux, & dont la souffrance n'est pas eternelle : Il est ennemy de l'iniustice, & ne va gueres temporisant, que la rebellion des Geans orgueilleux & malins veut regimber contre le Ciel.

V. M. SIRE, a veu perir en leur desobeissance (helas !) des premiers guerriers de la terre, & des plus fideles & des meilleurs soldats que l'on eust peu desirer ; Elle a voulu courre fortune elle mesme, & plusieurs fois dans ceste carriere, en maint lieu de hazard (tesmoin

8
l'Isle de Rié) dans vn âge, où non seulement les Roys & les Grands ont de l'amour à conseruer leur estre, mais iusqu'aux inferieurs. On sçait parmy nous les dangereux perils dont V. M. ne s'est vouluë exempter, à fin de remettre aux Blasons que nous tenons des Cieux la gloire qui leur est deuë; & n'est pas ignoré semblablement des Estrangers, de qui les vns recherchent d'en estre aliez par amour & par reuerence, & les autres par defiance & par crainte. Ayant neantmoins tant souffert & perdu (ce que les plus humains oubliroient difficilement, & difficilement pardonneroient) V. M. SIRE, leur en a remis la coulpe, & n'a desiré les perdre: car assurément ils l'estoient; & s'ils viuent, elle en est la cause seule après DIEU, qui nous fait viure.

Je n'embouche icy la trompette, afin que V. M. SIRE, ayt à gré de changer

ger sa naturelle clemence en rigueur (ce
que l'on diroit peut estre;) La Clemen-
ce estant de l'origine du Ciel, & fille de
DIEU, ie manquerois de raison, mais
comme j'ay dit ailleurs, & comme ie le
redis, si Iupiter est doux, il porte le fou-
dre: & parlant Chrestiennement, ce
grand DIEU parmy les tolerances qu'il
a fait admirer estant icy bas, a il pas esté
quelques fois rigoureux? a il pas chassé
rudement & violemment ceux qui
profanoient son Temple diuin? Ces re-
belles font ils pas de mesme, en profa-
nant de leurs abominables desseins les
pays de V. M. dans lesquels le bon-heur
& la felicité doiuent regner paisible-
ment?

Non, non, SIRE, qu'ils arment, qu'ils
roddent, qu'ils pillent, qu'ils menagent;
les rayons du Soleil escartent les broüil-
lards: vostre nom seul fera du tout esua-
nouyr leurs entreprises de neâr; & mal-

gré leurs trahisons, aduersaires du Lys
& de la fidelité, V. M. regnera plus auant
qu'ils ne desirent, faisant adorer par tout
à iamais les Croix blanches. Cela vous
est préparé, DIEU le veut, & sera, non-
obstât les efforts des ennemis de vostre
gloire. Il continuera les cheres faueurs
que sa Majesté Diuine a tousiours affe-
ctionné de respendre sur la vostre. Mais,
SIRE, comme elle fait pour vous, il est
raisonnable de faire pour elle: C'est en
rendant par la mort des vices la vie &
l'honneur aux vertus, qui sont le fonde-
ment & le bon heur des Royaumes &
des Roys: choses, dont leurs Souuerai-
nes Majestez ne peuuent tirer cognois-
sance & verité, que par les yeux & par la
bouche des inferieurs, qui leur doiuent
remonstrer.

Qui veid jamais, SIRE, & dans tous
les ages, tant de blasphemes & de iure-
ments publics? de superfluitéz immo-

cerces, de larcins & de meurtres, d'irre-
ligion, d'atheismes, de superstitions fol-
les & dangereuses, d'impietez, d'in-ob-
seruance aux iours commandez & re-
uerrez, d'vsures prodigieuses, de saletez
horribles, de frequentes lubricitez, de
mespris & de risée contre l'honneur &
le sçauoir, de rapines, de faussetez, de
brelands odieux & scandaleux, & bref
tant de licences, qu'il faudroit la voix
de mille Stentors pour les delduire? Ce-
la des-agrée infinimēt à DIEV, qui haït
les excez & les desreglements; & luy
desplaisant, il s'en colere & s'en venge;
& comment SIRE? avec les fleaux de la
guerre ciuile, de la peste, & de la faim
qu'il enuoye; ne restant plus que le der-
nier à nous traualler, & qui desia fait
son quartier en assez de logis incom-
modez, par les chartes licentieuses.

Vo⁹ estes de pere en fils de la race d'un
ROY, qui merite là haut d'entendre nos

voeux au nombre des Saincts, pour auoir deraciné les desordres couageusement & pieusement; V. M. SIRE, n'en fera moins, & DIEU l'en benira. Hierusalem fut destruite quelquesfois par les vices des-mesurez, & d'autres villes de son temps.

Les excès des meschants sont les instruments de l'ire Diuine, qui les permet à fin de nous chastier, ou de nous aduertir: & c'est pourquoy nous voyons ces esprits turbulents, ces des-naturez François coucher de leur reste, & n'auoir rien de plus agreable que de pescher en eauë trouble, en voulans mettre vn piege aux bons desirs de V. M. sans les prohibez & l'integrité de laquelle, i'oseray dire franchement que nous serions au bout de nos ailes: mais ceste ire de là haut nous est espargnée à cét effect, à nous, qui par nos maluerlations ferions trouuer douce la meschanceté la plus

grande.

Mais laissons faire à DIEU par ses bon-
tez & par sa miséricorde; & tandis, SI-
RE, continuez vos desirs, pour la gloire
& pour l'aduantage de la France & de
V. M. Vos Lieutenans mettront ce-
pendant à la raison ces mutins déloyaux,
& leur donneront la chasse par mer &
par terre, en renouuellant icy par eux
la fuite vergongneuse d'Anthoine &
de Cleopatre, s'ils valent de leur estre
comparez. Ouy, SIRE, les entreprises
glorieuses de V. M. reussiront: en
despit d'eux continuant ses genereux
desseins, elle ira, verra, surmontera les
ennemis de sa grandeur, car ils ne sont
pas du naturel de la Remore, pour arre-
ster vn nauire si grand. Et vous (s'il
m'est loisible que ie destourne ma voix
ailleurs, en suite des parolles que i'ose
tenir à la Majesté d'un grand Roy) vous
qui, de mesme Loy, ne trempez dans la

meisme rebellion, perleuez, demeurez-en là, jouyssant du calme & du bon-
heur que vous possédez heureusement
en la retenue qui vous est mieux seante
& plus fauorable: Que le deuoir, & les
obiects du passé vous y maintiennent:
car il est dangereux de heurter la patience
& la puissance des Roys. Apprehen-
dez les mains de l'Hercule de Tyrinthe;
que vous ne les aigrissiez point; mais
que plustost la voix attrayante de l'Her-
cule Gaulois attire vos affections, &
que perpetuellement vous y soyez at-
tachez.

Voila, SIRE, les paroles de zele &
de fidelité qu'un de vos tres-humbles
subjects, l'un des plus affectionnez &
des moins considerables, prend la har-
dieffe de tenir à V. M. comme iadis il a
fait; Priant DIEU, le Roy souuerain de
tous les Roys, & l'origine de tous biens,
qu'en ce mesme temps où le Grand

HENRY ſçeut reünir la ville capitale de
 ſon royaume à l'obeïſſance qu'elle doit
 à ſes Monarques, V. M. reünifle les pre-
 mières villes de celles qui n'ont voulu
 ſeſchir encore aux Loix de ſes com-
 mandemens & de ſa bonté. Je fais ces
 vœux à DIEU, qui nous en fera la grace,
 & qui vous en donnera la force & le
 pouuoir, en continuant les effects de
 ſon amour & de ſes affections.

SONNET.

Hercule eſt triomphant, pour auoir mis à bas
 Les Monſtres deſreiglez: vous triompherez SIRE,
 Tranchant le nœud de ceux qui broüillent voſtre Empire,
 Et qui de le broüiller ne ſeroient jamais las.

Arriere la douceur; il faut roidir le bras
 Contre ces malheureux, & point ne s'en deſdirez
 Iamais dans vn Eſtat il ne fut rien de pire
 Que les rebellions nourriſſes des combats.

Vn feu qui bruſſe ſous proüient d'vne eſtincelle;
 Vne eau forme vn torrent de la moindre parcelle
 Du nuage embrun qui roule dans les Cieux:

Vn œuf fait le ſerpent, le grain fait la tempeſte,
 Qui meſure ſon ſemps l'ayant deuant les yeux,
 Il ne peut atteinſt à meilleure conqueſte.





































































